

Deor

Welund him be wurman wræces cunnade, anhydig eorl earfoþa dreag, hæfde him to gesiþþe sorge ond longað, wintercealde wræce; wean oft onfond, siþþan hine Niðhad on nede legde, swoncre seonobende on syllan monn.

þæs ofereode, þisses swa mæg.

Beadohilde ne wæs hyre broþra deaþ on sefan swa sar swa hyre sylfre þing, þæt heo gearolice ongieten hæfde þæt heo eacen wæs; æfre ne meahte þriste gebencan, hu ymb þæt sceolde.

þæs ofereode, þisses swa mæg.

We þæt Mæðhilde monge gefruggon wurdon grundlease Geates frige, þæt hi seo sorglufu slæp ealle binom.

þæs ofereode, þisses swa mæg.

Deodric ahte þritig wintra Mæringa burg; þæt wæs monegum cup.

þæs ofereode, þisses swa mæg.

We geascodan Eormanrices wylfenne geþoht; ahte wide folc Gotena rices.

þæt wæs grim cyning.

Sæt secg monig sorgum gebunden, wean on wenan, wyscte geneahhe þæt þæs cynerices ofercumen wære.

þæs ofereode, þisses swa mæg.

Siteð sorgcearig, sælum bidæled, on sefan sweorceð, sylfum þinceð þæt sy endeleas earfoða dæl.

Mæg þonne gebencan, þæt geond þas woruld witig dryhten wendeþ geneahhe, eorle monegum are gesceawað, wislicne blæd, sumum weana dæl.

þæt ic bi me sylfum secgan wille, þæt ic hwile wæs Heodeninga scop, dryhtne dyre.

Me wæs Deor noma.

Ahte ic fela wintra folgað tilne, holdne hlaford, oppæt Heorrenda nu, leoðcræftig monn londryht geþah, þæt me eorla hleo ær gesealde.

þæs ofereode, þisses swa mæg.

Beowulf –The Funeral of Scyld Scefing

Him ða Scyld gewat to gescæphwile felahror feran on frean wære.

Hi hyne þa ætbæron to brimes faroðe, swæse gesiþas, swa he selfa bæd, þenden wordum weold wine Scyldinga, leof landfruma lange ahte.

þær æt hyðe stod hringedstefna, isig ond utfus, æþelinges fær.

Aledon þa leofne þeoden, beaga bryttan, on bearm scipes, mærne be mæste.

þær wæs madma fela of feorwegum, frætwa, gelæded; ne hyrde iccymlicor ceol gegyrwan hildewæpnum ond heaðowædum, billum ond byrnum; him on bearne læg madma mænigo, þa him mid scoldon on flodes æht feor gewitan.

Nalæs hi hine læssan lacum teodan, þeodgestreonum, þon þa dydon þe hine æt frumsceafte forð onsendon ænne ofer yðe umborwesende.

þa gyt hie him asetton segen geldenne heah ofer heafod, leton holm beran, geafon on garsecg; him wæs geomor sefa, murnende mod.

Men ne cunnon secgan to soðe, selerædende, hæleð under heofenum, hwa þæm hlæste onfeng.

Engla Tocyme (The Arrival of the English)

Ða wæs ymb feower hund wintra and nigon and feowertig fram ures drihtnes menniscnysse þæt Martianus casere rice onfeng and vii gear hæfde. Se wæs siexta eac feowertigum fram Augusto þam casere. Ða Angleþeod and Seaxna wæs gelaðod fram þam foresprecenan cyninge, and on Brytene com on þrim miclum scipum, and on eastdæle þisses ealondes eardungstowe onfeng þurh ðæs ilcan cyninges bebod, þe hie hider gelaðode, þæt hie sceoldon for heora eðle compian and feohtan. And hie sona compodon wið heora gewinnan, þe hie oft ær norðan onhergodon; and Seaxan þa sige geslogon, þa sendon hie ham ærendracan and heton secgan þisses landes wæstmþærnysse and Brytta yrþo. And hie þa sona hider sendon maran sciphere strengrena wigena; and wæs unoferswiðendlic werod, þa hie togædre geþeodde wæron. And him Bryttas sealdon and geafon eardungstowe betwuh him, þæt hie for sibbe and for hælo heora eðles campoden and wunnen wið heora feondum, and hie him andleofne and are forgeafen for heora gewinne.

Comon hie of þrim folcum ðam strangestum Germanie, þæt is of Seaxum and of Angle and of Geatum. Of Geata fruman sindon Cantware and Wihtsætan; þæt is seo ðeod þe Wiht þæt ealond oneardað. Of Seaxum, þæt is of ðam lande þe mon hateð Ealdseaxan, comon Eastseaxan and Suðseaxan and Westseaxan. Of Engle comon Eastengle and Middelengle and Mierce and eall Norðhymbra cynn; is þæt land ðe Angulus is genemned, betwuh Geatum and Seaxum; and is sægd of ðære tide þe hie ðanon gewiton oð todæg þæt hit weste wunige. Wæron ærest heora latteowas and heretogan twegen gebroðru, Hengest and Horsa. Hie wæron Wihtgilses suna, þæs fæder wæs Woden nemned, of ðæs strynde monigra mægða cyningcynn fruman lædde. Ne wæs ða ielding to þon þæt hie heapmælum comon maran weorod of þam þeodum þe we ær gemynegodon. And þæt folc ðe hider com ongan weaxan and miclian to þon swiðe þæt hie wæron on miclum ege þam selfum landbigengum ðe hie ær hider laðedon and cigdon.

Æfter þissum hie ða geweredon to sumre tide wið Pehtum, þa hie ær ðurh gefeoht feor adrifon. And þa wæron Seaxan secende intingan and towyrde heora gedales wið Bryttas, cyðdon him openlice and sægdon, nemne hie him maran andleofne sealden, þæt hie woldon him sylfe niman and hergian, þær hie hit findan mihton. And sona ða beotunge dædum læston; bærndon and hergodon and slogon fram eastsæ oð westsæ, and him nænig wiðstod. Ne wæs ungelic wræcc þam ðe iu Chaldeas bærndon Hierusaleme weallas and ða cynelican getimbru mid fyre fornomon for ðæs godes folces synnum. Swa þonne her fram þære arleasan ðeode, hwæðere rihte godes dome, neah ceastra gehwylce and land forhergode wæron. Hruron and feollon cynelicu getimbru somod and anlipie, and gehwær sacerdas and mæssepreostas betwuh wibedum wæron slægene and cwielmde; biscopas mid folcum buton ænigre are sceawunge ætgædre mid iserne and lige fornumene wæron. And ne wæs seo bebyrignys sealde þam ðe swa hreowlice acwealde wæron. And monige ðære earmen lafe on westenum fangene wæron and heapmælum sticode. Sume for hungre heora feondum on hand eodon and ecne þeowdom geheton wið ðæm þe him mon andleofne forgeafe; sume ofer sæ sorgiende gewiton; sume forhtiende on eðle gebidon and þearfende lif in wuda and in westenum and on heam clifum sorgiende mode symle dydon.

Ines Domas

Be Ines domum. xliiij. Ic, Ine, mid Godes giefe Westseaxena cyning, mid geðeahte ond mid lare Cenredes mines fæder ond Heddes mines biscopes ond Eorcenwaldes mines biscopes, mid eallum minum ealdormonnum ond þæm ieldstum witum minre ðeode ond eac micelre gesomnunge Godes ðeowa, wæs smeagende be ðære hælo urra sawla ond be ðæm staþole ures rices, ðætte riht æw ond rihte cynedomas ðurh ure folc gefæstnode ond getrymede wæren, þætte nænig ealdormanna ne us undergeðeodedra æfter þam wære awendende ðaus ure domas.

Be gefeohtum. I. Gif hwa gefeohte on cyninges huse sie he scyldig ealles his ierfes ond sie on cyninges dome hwæðer he lif age oþþe nage. Gif hwa on mynstre gefeohte, cxx scillinga gebete. Gif hwa on ealdormonnes huse gefeohte oððe on oðres geðungenes witan, lx scillinga gebete he ond oþer lx geselle to wite. Gif ðonne on gafolgeldan huse oððe on gebures gefeohte cxx scillinga to wite geselle and ðam gebure vi scillinga. Ond þeah hit sie on middum felda gefohten, cxx scillinga to wite sie agiefen. Gif ðonne on gebeorscipe hie geciden ond oðer hiora mid geðylde hit forbere, geselle se oðer xxx scillinga to wite.

Deniga Hergung (The Danes' Harrying)

Her on ðissum gearre ferde se here abutan Defnanscire into Sæfernumuðan ond þær gehegodon ægðer ge on Cornwealum ge on Norðwealum ond on Defenum, ond eodon him þa up æt Wecedport and þær micel yfel worhton on bærnente and on manslihtum. Ond æfter þam wendon eft abutan Penwihtsteort on ða suðhealfe ond wendon þa into Tameruðan ond eodon þa up oðþæt hie comon to Hlidaforda ond ælc ðing bærnendon ond slogon þæt hie gemetton ond Ordulfes mynster æt Tæfingsctoce forbærndon ond unasegendlice herehuðe mid him to scipum brohton.

Durham

Is ðeos burch breome geond Breotenrice, steppa gestaðolad, stanas ymbutan wundrum gewæxen.

Weor ymbeornad, ea yðum stronge, and ðer inne wunað feola fiska kyn on floda gemonge.

And ðær gewexen is wudafæstern micel: wuniad in ðem wycum wilda deor monige, in deope dalum deora ungerim.

Is in ðere byri eac bearnum gecyðed ðe arfesta eadig Cudberch and ðes clene cyninges heafud, Osuualdes, Engle leo, and Aidan biscop, Eadberch and Eadfrið, æðele geferes.

Is ðer inne midd heom æðelwold biscop and breoma bocera Beda, and Boisil abbot, ðe clene Cudberte on gecheðe larde lustum, and he his lara wel genom.

Eardiað æt ðem eadige in in ðem minstre unarimeda reliquia, ðær monia wundrum gewurðað, ðes ðe writ seggeð, midd ðene drihnes wer domes bideð.

The Ordeal (B. Be ðon ðe ordales weddigap)

GIF hwa ordales weddige, ðonne cume he, þrim nihtum ær, to þam mæssepreoste þe hit halgian scyle, and fede hine sylfne, mid hlafe and mid wætre and sealte and wyrpum ær he to gan scyle, and gestonde him mæssan þæra þreora daga ælcne, and offrige to and ga to husle ðy dæge þe he to ðam ordale gan scyle, and swerige ðonne þone að þæt he sy mid folcryhte unscyldig ðære tihltan, ær he to ðam ordale ga.

And gif hit sy wæter, ðæt he gedufe oþre healfe elne on þam rape. Gif hit sy isenordal, beon ðreo niht ær mon þa hond undo.

Wix Dweorh (Against a Dwarf)

Wið dweorh man sceal niman VII lytle oflætan, swylce man mid ofrað, and writan þas naman on ælcra oflætan: Maximianus, Malchus, Iohannes, Martimianus, Dionisius, Constantinus, Serafion.

þænne eft þæt galdor, þæt her æfter cweð, man sceal singan, ærest on þæt wynstre eare, þænne on þæt swiðre eare, þænne bufan þæs mannes moldan.

And ga þænne an mædenman to and ho hit on his sweoran, and do man swa þry dagas; him bið sona sel.

Her com in gangan, in spiderwiht, hæfde him his haman on handa, cwæð þæt þu his hæncgest wære, legde þe his teage an sweoran.

Ongunnan him of þæm lande liþan; sona swa hy of þæm lande coman, þa ongunnan him ða liþu colian.

þa com in gangan dweores sweostar; þa geændade heo and aðas swor ðæt næfre þis ðæm adlegan derian ne moste, ne þæm þe þis galdor begytan mihte, oððe þe þis galdor ongalan cuþe.

Amen.

Fiað.

Wix Wennum (Against a Wen)

Wenne, wenne, wenchichenne, her ne scealt þu timbrien, ne nenne tun habben, ac þu scealt north eonene to þan nihgan berhge, þer þu hauest, ermig, enne broþer.

He þe sceal legge leaf et heafde.

Under fot wolues, under ueþer earnes, under earnes clea, a þu geweornie.

Clinge þu als wa col on heorþe, scring þu als wa scerne awage, and weorne als wa weter on anbre.

Swa litel þu gewurþe als wa linsetcorn, and miccli lesse als wa anes handwurmes hupeban, and als wa litel þu gewurþe þet þu nawiht gewurþe.

Wix Wæterælfadle (For the Water-Elf Disease)

Gif mon biþ on wæterælfadle, þonne beoþ him þa handnæglas wonne and þa eagan tearige and wile locian niþer.

Do him þis to læcedome: eoforþrote, cassuc, fone niopoweward, eowberge, elehtre, eolone, mersmealwan crop, fenminte, dile, lilie, attorlaþe, polleie, marubie, docce, ellen, felterre, wermod, strewbergean leaf, consold.

ofgeot mid ealaþ, do hælignwæter to, sing þis gealdor ofer þriwa: Ic benne awrat betest beadowræda, swa benne ne burnon, ne burston, ne fundian, ne feologan, ne hoppettan, ne wund waxsian, ne dolh diopian; ac him self healde halewæge, ne ace þe þon ma, þe eorþan on earce ace.

Sing þis manegum siþum: Eorþe þe onbere eallum hire mihtum and mægenum. þas galdor mon mæg singan on wunde.

The Nine Herbs Charm

Gemyne ðu, mucgwyr, hwæt þu ameldodest, hwæt þu renadest æt Regenmelde.

Una þu hattest, yldost wyrta.

ðu miht wið III and wið XXX, þu miht wiþ attre and wið onflyge, þu miht wiþ þam laþan ðe geond lond færð.

Ond þu, wegbræde, wyrta modor, eastan openo, innan mihtigu; ofer ðe crætu curran, ofer ðe cwene reodan, ofer ðe bryde bryodedon, ofer þe fearras fnærdon.

Eallum þu þon wiðstode and wiðstunedest; swa ðu wiðstonde attre and onflyge and þæm laðan þe geond lond fereð.

Stune hætte þeos wyr, heo on stane geweox; stond heo wið attre, stunað heo wærce.

Stiðe heo hatte, wiðstunað heo attre, wreceð heo wraðan, weorpeð ut attor.

þis is seo wyr seo wiþ wrym gefeaht, þeos mæg wið attre, heo mæg wið onflyge, heo mæg wið ðam laþan ðe geond lond fereþ.

Fleoh þu nu, attorlaðe, seo læsse ða maran, seo mare þa læssan, oððæt him beigra bot sy.

Gemyne þu, mægðe, hwæt þu ameldodest, hwæt ðu geændadest æt Alorforda; þæt næfre for gefloge feorh ne gesealde syþðan him mon mægðan to mete gegyrede.

þis is seo wyr ðe wergulu hatte; ðas onsænde seolh ofer sæs hrygc ondan attres oþres to bote.

Ðas VIII magon wið nygon attrum.

Wrym com snican, toslat he man; ða genam Woden VIII wuldortanas, sloh ða þa næddran, þæt heo on VIII tofleah.

þær geændade æppel and attor, þæt heo næfre ne wolde on hus bugan.

Fille and finule, felamihtigu twa, þa wyrte gesceop witig drihten, halig on heofonum, þa he hongode; sette and sænde on VII worulde earmum and eadigum eallum to bote.

Stond heo wið wærce, stunað heo wið attre, seo mæg wið III and wið XXX, wið feondes hond and wið færþregde, wið malscrunge manra wihta.

Nu magon þas VIII wyrta wið nygon wuldorgeflogenum, wið VIII attrum and wið nygon onflygnum, wið ðy readan attre, wið ðy runlan attre, wið ðy hwitan attre, wið ðy wedenan attre, wið ðy geolwan attre, wið ðy grenan attre, wið ðy wonnan attre, wið ðy wedenan attre, wið ðy brunan attre, wið ðy basewan attre, wið Wrymgeblæd, wið wætergeblæd, wið þorngeblæd, wið þystelgeblæd, wið ysgeblæd, wið attorgeblæd, gif ænig attor cume eastan fleogan oððe ænig norðan cume oððe ænig westan ofer werðeode.

Crist stod ofer adle ængan cundes.

Ic ana wat ea rinnende þær þa nygon nædran nean behealdað; motan ealle weoda nu wrytum aspringan, sæs toslupan, eal sealt wæter, ðonne ic þis attor of ðe geblawe.

Mucgwyr, wegbrade þe eastan open sy, lombescyrse, attorlaðan, mageðan, netelan, wudusuræppel, fille and finul, ealde sapan.

Gewyrc ða wyrta to duste, mængc wiþ þa sapan and wiþ þæs æpples gor.

Wyrce slypan of wætere and of axsan, genim finol, wyl on þære slyppan and beþe mid æggemongc, þonne he þa sealfe on do, ge ær ge æfter.

Sing þæt galdor on ælcra þara wyrta, III ær he hy wyrce and on þone æppel ealswa; ond singe þon men in þone muð and in þa earan buta and on ða wunde þæt ilce galdor, ær he þa sealfe on do.

Læcedomas

Wið ða blegene genim nigon ægra ond seoð hie fæste, ond nim þa geolcan ond do þæt hwite aweg, ond mera ða geolcan on anre pannan, ond wring þæt wos ut þurh ænne clað, ond nim eall swa fela dropena wines swa ðara ægra beo, and eall swa fela dropena unhalgodes eles, ond eall swa fela huniges dropena, ond of finoles moran eall swa fela dropena, genim ðonne ond do hit eall tosomne ond wring ut ðurh ænne clað ond sele ðam menn etan. Him bið sona sel.

Gif mon ðung ete, aþecge buteran ond drince – se ðung gewit on ða buteran. Eft wið ðone, stande on heafde, aslege him mon fela scarpna on þam scancan, þonne gewit ut þæt atter þurh þa scarpna.

Beowulf's Greeting

Beowulf maðelode on him byrne scan, searonet seowed smiþes orþancum: Wæs þu, Hroðgar, hal.

Ic eom Higelaces mæg ond magoðegn; hæbbe ic mæra fela ongunnen on geogoþe.

Me wearð Grendles þing on minre eþeltyrf undyrne cuð; secgað sæliðend þæt þæs sele stande, reced selesta, rinca gehwylcum idel ond unnyt, siððan æfenleoht under heofenes hador beholen weorþeð.

þa me þæt gelærdon leode mine þa selestan, snotere ceorlas, þeoden Hroðgar, þæt ic þe sohte, forþan hie mægenes cræft minne cuþon, selfe ofersawon, ða ic of searwum cwom, fah from feondum.

þær ic fife geband, yðde eotena cyn ond on yðum slog niceras nihtes, nearoþearfe dreah, wræc Wedera nið wean ahsodon, forgrand gramum, ond nu wið Grendel sceal, wið þam aglæcan, ana gehegan ðing wið þyrse.

Ic þe nu ða, brego Beorhtdena, biddan wille, eodor Scyldinga, anre bene, þæt ðu me ne forwyrne, wigendra hleo, freowine folca, nu ic þus feorran com, þæt ic mote ana ond minra eorla gedryht, þes hearda heap, Heorot fælsian.

Hæbbe ic eac geahsod þæt se æglæca for his wonhydum wæpna ne recceð.

Ic þæt þonne forhicge swa me Higelac sie, min mondrihten, modes bliðe, þæt ic sweord bere oþðe sidne scyld, geolorand to guþe, ac ic mid grape sceal fon wið feonde ond ymb feorh sacan, lað wið laþum; ðær gelyfan sceal dryhtnes dome se þe hine deað nimeð.

Wen ic þæt he wille, gif he wealdan mot, in þæm guðsele Geotena leode etan unforhte, swa he oft dyde, mægen Hreðmanna.

Na þu minne þearft hafalan hydan, ac he me habban wile dreore fahne, gif mec deað nimeð.

Byreð blodig wæl, byrgean þenceð, eteð angenga unmurnlice, mearcað morhopu; no ðu ymb mines ne þearft lices feorme leng sorgian.

Onsend Higelace, gif mec hild nime, beaduscruða betst, þæt mine breost wereð, hræglas selest; þæt is Hreðlan laf, Welandes geweorc.

Gæð a wyrd swa hio scel.

The Battle of Brunanburh

Her Æþelstan cyning, eorla dryhten,
beorna beahgifa and his broþor eac,
eadmund æþeling, ealdorlangne tir
geslogon æt sæcce sweorda ecgum
ymbe Brunanburh. Bordweal clufan,
heowan heaþolinde hamora lafan,
afaran eadweardes swa him geæþele wæs
from cneomægum þæt hi æt campe oft
wiþ laþra gehwæne land ealgodon,
hord and hamas. Hettend crungun,
Sceottta leoda and scipflotan
fæge feollan, feld dænnede
secga swate siðþan sunne up
on morgentid, mære tungol,
glad ofer grundas, godes condel beorht,
eces drihtnes, oð sio æþele gesceaft
sah to setle. Þær læg secg mænig
garum ageted, guma norþerna
ofer scild scoten swilce Scittisc eac
werig, wiges sæd. Wesseaxe forð
ondlongne dæg eoredcistum
on last legdun laþum þeodum,
heowan herefleman hindan þearle
mecum mylenscearpan. Myrce ne wyrndon
heardes hondplegan hæleþa nanum
þæra þe mid Anlafe ofer æra gebland
on lides bosme land gesohtun,
fæge to gefeohte. Fife lægun
on þam campstede cyningas giunge,
sweordum aswefede, swilce seofene eac
eorlas Anlafes unrim heriges,
flotan and Scotta. Þær geflemed wearð
Norðmanna bregu, nede gebeded,
to lides stefne litle werode;
cread cnear on flot, cyning ut gewat
on fealene flod, feorh generede.
Swilce þær eac se froda mid fleame com
on his cypþe norð Costontinu
har hilderinc, hreman ne þorfte
mæca gemanan, he wæs his mæga sceard
freonda gefylled on folcstede,
beslagen æt sæcce and his sunu forlet
on wælstowe wunden forgrunden,
giungne æt guðe. Gelpan ne þorfte
beorn blandenfeax bilgeslihtes,
eald inwidda, ne Anlaf þy ma;
mid heora herelafum hlehhan ne þorftun
þæt heo beaduweorca beteran wurdun
on campstede cumbolgehnastes,

garmittinge, gumena gemotes,
wæpengewrixles, þæs hi on wælfelda
wiþ eadweardes afaran plegodan.
Gewitan him þa Norþmen nægledcnearrum,
dreorig daraða laf on Dinges mere
ofer deop wæter Difelin secan,
eft Iraland æwiscmode.
Swilce þa gebroþer begen ætsamne,
cynig and æþeling cyþþe sohton,
Wesseaxna land wiges hremige.
Letan him behindan hræw bryttian
saluwigpadan þone sweartan hræfn
hyrnednebban and þane hasewanpadan
earn æftan hwit, æses brucan
grædigne guðhafoc and þæt græge deor
wulf on wealde. Ne wearð wæl mare
on þis eiglande æfre gieta
folces gefylled beforan þissum
sweordes ecgum þæs þe us secgaþ bec,
ealde uðwitan, siþþan eastan hider
Engle and Seaxe up becoman
ofer brad brimu Brytene sohtan,
wlance wigsmiþas, Wealas ofercoman,
earlas arhwate eard begeatan.

Blagkmon

He wæs broðor min blacmon þeoden
æðele ealdor anrades hyges
þeah he a swa rihte ricsode swa he meahte
him wiðsawon suhtrigan earge
grimme leodmagas gryrefah geþrang.
Heard wæs hæleðe hildþracu on morum.
Oðwand þonan eodor ær æfen com
brego mid wigheape west to garsecge
leofa wealdend þurh laðne cræft
wraðe gefliemed forþ to elþeode
on wægflotum twæm wilgiefa mid cempum
þa drefde lagu dædcene flocc.
Fram streamstæðe feorr stormwind geslog
brimliðendra scipu on brantum wætrum
þæt wæs micel wundor þæt wæpenwigan
on ærmergen iegclifu sawon
scimgerihte ofer sciene flod
gimstan on flote þe god us geheold.
Her we awunodon hearra mid þegnum
brego mid beadorincum blacmon cynebald
her on mænige mædwum ond beorgum
weold þus gleawe wintra twentig

ure þengel þegnborn manna
norðanhymbrum þe him neah wunodon
eallum his niedmagum nu gesundum.
Peohtas hræðre pæhton urne æðeling
tunstede gestodon treowlease on niht
folcgewerend þus feond ofslog
hæðencynnes hetelic yfeldæda
þa mind bangare of burge gefleah.

Þenden sunne nu sincþ under snawbeorghliþ
blawaþ blæstas bittere ofer hæðe
geomore ic begnornie his grimne deaþ.
Runstafas on rodstane rihthlafordes naman
blacmon gecyðaþ cynecunnes leoht
he wæs broðor min bealocwealme genumen
metod a gehealde on heofone his þeow
hlaford mænige mildne bealdor
dryhten on swegle to domdæge giefe
iegfolce friðu frea ælmihtig
a buton ende eallwealdend cyning.